

«Jagdgeflüster» - crimi da Sabina Altermatt

Il settember vegn la publicaziun sin fiera

DA CLAUDIA CADRUVI / ANR

■ **Gist ad uras sin il temp da chatscha cumpara «Jagdgeflüster». Il crimi situà en l'Engiadina è ina lectura ideala per tut quels che na ristgan betg dad ir en il liber durant ch'ils chatschadurs lajegan sin lur predas.** La protagonista dal cudesch sa numna Rea, deriva da la Bassa ed è dapi curt temp selvicultura da Zuort. L'emprim di da chatscha resta ella pli gugent en biro e liquidescha scar-

tiram – quai è pli segir. A ses bostgers ha ella aposta dà liber. Ma damai ch'in pign è sa derschi sur ina senda e turists han reclamà, sto Rea tuttina sa render en il gaud per rumir davent la planta.

En il gaud fa ella in chat orribel. In corp penda vid ina planta. Betg quel d'ina chavriel u d'ina tscharva. Quel d'in um. Taglià si dal pèz fin al penis e sbuttatschà sco ina selvaschina. Igl è – u plitost era – il president da vischnanca da Zuort.

Famas d'in chamutsch alv

En vischnanca vai liber cun speculaziuns. I haja gea stuì vegnir adaquella. Tgi che sajettia in chamutsch alv, saja mort entaifer in onn. Durant la chatscha passada aveva il capo sajettà in albino. Ils blers abitants da Zuort suspecteschan ils verds. Dapi ch'il capo aveva procurà tar il chantun ch'ins liquideschia l'urs che ha stgarpà intginas nursas, aveva el survegnì pliras brev cun smanatschas da mort.

La polizia arrestescha dentant betg in verd, mabain il bostger Mario. Rea na po nunpussaivel s'imaginar che ses collavuratur haja da far insatge cun la chaussa. In di stat Mario avant porta. El è scappà ord praschun. Rea saja la suletta a la quala el possia fidar. Ella stoppia gidar a chattar ora, tgi che haja mazzà il capo per mussar si che Mario saja senza culpa. Ma co duai Rea, che ha il tgil plain da far cun job ed uffant, sclerir si in mazzament?

In tschert M17 vegn a Zuort

Betg tuts èn trists da la sort dal capo. Anzi, la chanzlista Corina Kunfermann ha svelt per maun in candidat sco successur. Numnadamain l'advocat Andri Bott che viva en la citad, lascha encrescher per ils culms e che planisescha cun intgins investurs in project innovativ che duess purtar schlantsch economic a la regiun. Rea cumenza a gizzar las ureglias e fa retschertgas. Ils fastizis mussan en tuttas direzziuns, perfin Leta che ha fin uss adina guardà uschè bain da la figlia da Rea, sa deporta tuttenina pli che curius. Sabina Altermatt scriva stoda spannegiant e pachetescha actualitads in urin en ses nov cudesch. Top actuala è l'atura era pertutgant l'urs. Ses nov cudesch deditgescha ella a M13 ch'è vegnì sajettà il 2013. En il crimi lascha Altermatt viandar in tschert M17 sur il pass vers la vischnanca da Zuort. È quai forsa quest urs ch'è cumparì gist ussa en la Val Müstair?

Ils 12 da settember festiveschan ins la premiera dal cudesch en la Staziun a Lavin. A las 19.00 datti ina tschaina ed a las 21.00 cumenza la prelecziun. Sabina Altermatt: «Jagdgeflüster», roman criminal. Chasa editura Piper. 240 paginas. 13.90 francs. Cumpara ils 14 da settember.



L'atura e scribenta Sabina Altermatt è creschida si a Cuira.